

四庫全書

子部

欽定四庫全書

子部

唐開元占經卷一百六十二

詳校官中書臣李采

靈臺郎臣倪廷梅覆勘

總校官編修臣王燕緒

校對官中書臣王慶長

謄錄監生臣龔際葵

欽定四庫全書

唐開元占經卷一百六

星圖

唐

瞿曇悉達撰

二十八宿星座古今同異

東方青龍七宿一

角二星十二度夾左角星去極九十一度鄭分舊南星

在赤道內一度今測其南星正押赤道亢四星距西

第二星去極八十度鄭分舊南第二星在赤道外今測

在赤道內二度 氐四星十五度距西南星去極九十
四度宋分古今同 房四星鈎鈐二星五度距西南第
二星去極一百八度宋分古今同 心三星古今同五
度距前第一星去極一百八度半宋分 尾九星神宮一
星十八度距本第二星去極一百二十四度燕分舊去
極一百二十度又三星入河今去極一百二十四度有
六星入河又距星傍有一星舊不載按古經讚云神宮
一星在尾第二星傍主解衣之內室既有古讚今附入

其天河審視天河曲邪中絕與舊不同並依天改正
箕四星十一度距西北星去極一百二十四度燕分舊
四星並在河內審視天南二星出河其天河與舊不同
今並依天改正

北方玄武七宿二

南斗六星二十六度四分度之一距魁南第四星去極
一百一十六度吳分舊柄第二星在黃道內又魁二星
出河今測在黃道外魁四星出河 牽牛六星八度距

中央大星去極一百一十度吳分舊南二星入南斗度
一星在牽牛度今視天三星並在牽牛度元不入斗又
舊去極一百六度今測一百一十度 須女四星十二
度古今同去極一百六度趙分 虛二星十度古今同
距南星去極一百四度齊分 危三星墳墓四星古今
同十七度距西南星去極九十九度齊分 營室二星
離宮六星十六度距南星去極八十五度衛分古今同
東壁二星九度距南星去極八十六度衛分古今同

西方白虎七宿三

奎十六星距西南大星去極七十度魯分舊去極七十
七度今測七十度又舊星並均今視天即有疎有密大
小不等 婁宿古今同三星十二度距中央大星去極
八十度魯分 昂古今同七星十一度距西南第一星
去極七十四度趙分 畢古今同八星附耳一星十六
度距左股第一星去極七十八度趙分 觜古今同三
星二度距西南星去極八十四度晉魏分 參古今同

十星九度距中央西星去極九十四度晉魏分

南方朱雀七宿四

東井八星鉞一星三十三度距南轅西頭去極七十度
秦分星經云去極七十度其距星舊在黃道內一度又
八星並在河今以儀測在黃道外一度又北轅二星出
河 輿鬼四星四度距西南去極六十八度秦分 舊
積尸積兵帛積金玉等四星正指四方今積尸等並全
出黃道內又外四星斜指四隅 柳八星十五度距西

頭第三星去極七十七度周分舊西南口頭欠一星東
頭尾後加一星添滿八星今視天尾後無星其星本在
口邊今改正 星七星七度距中央大星去極九十一
度周分舊去極九十七度距星合在赤道外六度舊在
赤道內一度今測去極九十度星正押赤道 張宿古

今同六星十八度距前第一星去極九十七度周分

翼二十二星十八度距中央西星去極九十九度楚分

舊距前第一星按經今距中央西星今測正距中央西

星又星有遠近斜曲小異 軫四星長沙一星轄二星
十七度距西北星去極九十八度楚分舊距西南星即
與經旨乖舛今測取西北星即得確傳度數如中央距
星並合赤道外

唐開元占經卷一百六

欽定四庫全書

唐開元占經卷一百七

星圖二

唐 瞿曇悉達 撰

石氏中官星座古今同異

攝提古今同六星夾大角 大角同一星 梗河三星

大角北 西星曲向南今視西星亦端直 招搖古今

同一星梗河北 玄戈古今同一星招搖北 天槍古

今同三星北斗柄東 天棓古今同五星女牀東北

女牀古今同三星天紀星北 七公古今同七星招搖
東 貫索古今同九星七公前 天紀九星貫索東舊
在尾箕度今測東三星入南斗度近織女 織女古今
同三星天紀星東端 天市垣二十二星房心東北端
舊東垣從南門第一星至第五星並在赤道外今測從
門頭星至第三星在赤道外餘星在赤道內又東垣第
二星第六星在河裏舊圖並不入市又審視天河一差
入市 帝座古今同一星在市中 候古今同一星帝

座東南 宦者古今同四星帝座西 斗五星在宦者
西南舊斗星口仰兼背斜今視天斗口向下覆斜 宗
正古今同二星帝座東南 宗人舊在河外今在河內
四星宗正東宗星舊兩星相去遠今測兩星相去近二
星宗人北東咸古今四星房東北 西咸舊四星並在
房星西赤道外北一度今測在房星西北三星在赤道
內房度一星在赤道外氏一度四星房西北 天江古
今同四星在尾北 建星舊五星在黃道內兼一星又

一星在黃道外今測六星並在黃道內元不入河六星在南斗北 天弁舊大小遠近並均又偃勢覆向下今測有疎密大小不均其偃勢仰向上又視天河與舊不同九星在建星北 河鼓舊三星并旗六星並入河又旗南四星在赤道外今測河鼓唯北一星及旗三星入河又旗南唯三星在赤道外視天河正當河差河鼓并旗十二星在牽牛北 離珠舊在須女又在須女北橫列今測在牽牛度又在須女西北豎立五星在須女西

北 匏瓜舊並在河中又近天津今測在河外又去津
遠又視天河與舊不同五星在離珠北 天津舊並在虛
度仍豎唯二星出河今測向西北東南斜指入牽牛女
虛等度及有六星出河又視天河有斷絕委曲不同九
星在虛北河中螣蛇舊八星出河今視唯尾末二星出
河二十二星在奎北河中 閣道舊北四星出河今測
北二星出河六星在王良北 附路古今同一星閣道
傍 天大將軍舊星並均圓曲向上今測星有出入不

均十一星在婁北 大陵古今同八星在胃北 天舡

舊四星出河今在河內九星在大陵北河中 卷舌舊

北二星入河今並在河外六星在昴北 五車舊東北

及西北星入河今出河又西北柱舊雙星向上今測向

下又車北柱舊雙星在東北今向西北五車三柱十四

星在畢東北端 天關古今同一星五車南參西北

南河北河南河舊在河內西二星入前實沉次今測不

入河亦不入前次復在河外又在後鶉首次北河舊在

鶉首次今測二星入前實沉次六星夾東井五諸侯舊
東頭第一星在黃道外今測在黃道內四度 又舊東
頭第二星曲向南今乃曲向北又與第三星相近五星
在東井北近北河 積水積薪二星舊在鶉首次今並
在前實沉次 積水一星北河西北積薪一星積水東
南 水位舊南二星入河今四星並在河外四星東井
東南北列 軒轅舊尾漸斜向上其右角在黃道內今
測其尾勢迤邐向西其左角出黃道外半度不在內十

七星在七星大星北 少微同四星太微西南北列

太微古今同十星在翼軫北 黃帝座舊四星去黃帝

座近遠並相侶今有近有遠不等黃帝座一星在太微

中四帝四星夾黃帝座 內屏古今同四星在黃帝座

南郎位舊取端正均配行列今有偏并不均十五星在

帝座東北 郎將古今同一星郎位東北 常陳古今

同七星如畢狀帝座北 三台古今同六星兩兩而居

起文昌列抵太微 相星太陽守二座舊重四相當今

太陽守在相星西南相一星北斗南太陽守一星相星
西南 天牢舊均圓近中台今其星北斗魁下兼有踈
有密 文昌古今同六星北斗魁前 北斗古今同七
星輔一星在太微北 紫微宮垣兩蕃舊在婁昴
畢井柳張軫等度今測在胃畢井鬼七星張軫等度十
五星東蕃八西蕃七北斗北 北極古今同五星 鈎
陳六星皆在紫微宮中 天一太一舊並在軫度今俱
在翼度天一一星紫微宮門外右星南太一一星天一

星南相近

唐開元占經卷一百七

欽定四庫全書

唐開元占經卷一百八

星圖三

唐 瞿曇悉達 撰

石氏中官星座古今同異

庫樓古今同十星五柱十五星衝四星凡二十九星在
角南 北落師門古今同一星羽林西南 土司空舊
在奎度天溷東南視天在東壁度一星奎南 土司空
新圖溷西南 南門古今同二星庫樓南 平星古今

同二星庫樓北 天倉舊二星在奎度三星在婁度今
五星在奎度一星在婁度六星在婁南騎官舊三三又
列並均今其星有疎密有橫豎亦有斜不均二十七星
在氐南 天囷古今同十三星在胃南 天廩舊四星
並在赤道內西北東南列今三星在赤道外又西南東
北列四星在昴南 積卒古今同十二星房心南 龜
星舊四星入河一星出河審視天唯一星入河四星出
河又天河曲直與舊不同五星在尾南 天苑古今同

十六星昴畢南 傳說古今同一星在尾後 魚星舊

在傳說東南今測在傳說東北其天河斷絕曲斜與舊

不同一星在尾河中 杵星古今同三星在箕南 參

旗古今同九星在參西一名天弓 玉井古今同玉井

四星在參左足下 天屏古今同二星玉井南 鼈星

舊在南斗度又在斗魁東南今測在箕度又在斗魁西

唯東一星入南斗度十四星南斗南 厠星古今同四

星在屏東 天矢古今同一星在厠南 軍市舊在厠

正東又星並均圖今測在東北其星有相近亦有踈闊
十三星參東南 九坎舊在斗牛女度今在斗牛度不
至女宿九星牽牛南 狼星古今同一星參東南 敗
臼舊在須女危度今測唯在虛度四星虛危南 弧星
舊全坐並在河外今測東頭一星入河並踈密大小不
依象九星東南 壘壁陳東頭第一星入東壁度又西
頭五星入危度今測不入東壁度又西頭六星入危度
其羽林舊八星絡東壁距道入壁度三三又對南北分

為五行西一星入危度審視不絡東壁度西九星入危
度南北只有四行亦有不相入者羽林四十五星壘壁
十二星凡五十七星室壁南 老人古今同一星在弧
南 稷星古今同五星七星南

唐開元占經卷一百八

欽定四庫全書

唐開元占經卷一百九

星圖四

唐 瞿曇悉達 撰

甘氏中官古今同異

天皇大帝古今同一星鉤陳口中 四輔古今同四星

抱北極樞 華蓋古今同七星杠九星凡十六星大帝

上 周鼎古今同三星攝提西 帝席古今同三星在

角南 平道古今同二星左右角間 五帝內座古今

同五星華蓋上 六甲古今同六星華蓋傍 天柱古
今同五星紫微宮中近東垣 進賢古今同一星平道
西 謁者古今同一星左執法東北三公內座古今同
三星謁者東北 九卿內座古今同三星三公北 柱
下史舊經云在北極東南斗度審視在北極東北牽度
一星北極東北 女史舊圖在南斗度今測在須女度
當柱下史北與紫宮東垣南第六星相近一星柱下史
北近紫微東垣第六星內 五諸侯古今同五星九卿西

太子古今同一星黃帝座東北 從官古今同一星太

子西北 幸臣古今同一星太子東北 尚書古今

同五星紫微宮門內東維 陰德古今同二星尚書西

天牀舊圖普潤促均齊視天乃狹長兼有明暗六星

紫宮門外 天理古今同四星北斗魁中 內厨古今

同二星紫微宮西南角外 明堂古今同三星大微西

南角外 靈臺古今同三星明堂西 勢星古今同四

星太陽守西北 內平舊云在中台南舊圖在軒轅腹

又在柳七星度今測在中台南張七度復與星經同四星中台南 耀星舊圖在軒轅腹內今測在軒轅尾南近柳北四星 內階經云在文昌北舊圖安星在八穀北畢嘴東井等度其星又闊促今測在文昌北東井柳度又狹長兩相近亦與星經本文同六星文昌北天厨舊在虛危度並闊促均齊今測在南斗牽牛須女虛等度又狹長明暗不等 酒旗古今同三星軒轅右角南 天鐔古今同三星東井北 諸王古今同六星

五車南 司怪舊圖端列南第一星出河審視天並在
河內又向西曲四星在鉞星前 座旗舊去在司怪西
北舊圖及視天並司怪東北九星 天高古今同四星
參旗西近畢 策星舊圖在河外今在河內一星王良
前 傳舍舊圖在奎婁度今測在東壁奎婁胃等度九
星華蓋上近河傍 造父古今同五星鉤星南河中
礪石古今同四星五車南 八穀古今同八星五車北
天讒古今同一星卷舌中 積水古今同一星天船

中 積尸古今同一星大陵中 車府古今同七星天

津東近河傍 人星古今同五星車府東南 曰杵古

今同三星人星傍 曰星古今同四星人星東南 左

更古今同五星在婁東 右更古今同五星在婁西

軍南門舊在天將大軍西近奎北以儀測在天將軍南

如奎正東一星天將軍西南 天橫舊四星東西列一

星在北審視天四星南北列一星在西五星在五車中

扶匡舊在須女度東北西南行列又在子規外審視

天在南斗度東南北行列又在子規內唯一星在規外
司命古今同二星在虛北 司祿古今同二星司命
北 司危古今同二星司祿北 司非古今同二星司危北
敗瓜舊四星入河一星出河又橫審視天並在河外
又豎五星匏瓜傍 咸池舊圖在五車中近東今測近
西附金柱三星天潢西北 月星古今同一星在昴東
天街舊圖絡黃道今在黃道北二星昴畢間近月星
東 天河古今同一星在昴西 河鼓左旗舊九星並

入河今測三星出河九星河鼓左傍 天雞古今同二

星狗國北 羅堰古今同三星牽牛東 市樓舊在赤

道外今測在赤道內六星在市中臨箕上 斛星古今

同四星在市中斗南 日星古今同一星房中道前

天乳古今同一星在氐北 亢池古今同六星在亢北

漸臺古今同四星屬織女東足 輦道舊星並均南

斗度又在河外今其星有遠有近南二星入牽牛度又

入河五星屬織女西足 三公古今三星在北斗西南

唐開元占經卷一百九

欽定四庫全書

唐開元占經卷一百十

星圖

唐 瞿曇悉達 撰

二十八宿

甘氏外官一

青丘古今同七星在軫東南 折威古今同七星在亢
南 陣車古今同三星在氐南 騎陣將軍古今同一
星 騎官中東端 糠星古今同一星箕舌前 車騎古

今同三星騎官南 農丈人舊在狗星西南今在狗星

西一星南斗西南 狗星古今同二星南斗魁前 狗

國古今同四星建星東南 天田古今同九星牽牛南

哭星古今同三星在虛南 泣星古今同二星在哭

東 蓋屋二星在危南 八魁舊三星在營室度六星

在危度今並在營室度九星北落東南 雷電古今同

營室西南 雲雨古今同四星霹靂西南 霹靂古今

同五星土公西南 土公古今同二星東壁南 土公

吏古今同二星營室西南 鈇鎖古今同五星天蒼西
南 天溷古今同七星外屏南 外屏古今古七星在
奎南 天庾古今同三星天倉東南 芻藁古今同六
星天苑西 天園古今同十三星天苑南 九州殊口
古今同九星天節下 天節古今同八星畢附耳下星
南 九遊古今同玉井西南 軍井經云玉井東南舊
在屏南今在屏東四星 水府舊在東井南河外今在
河內四星東井南 四瀆一星入河三星出河今三星

入河一星出河四星東井南轅東 闕丘舊在南河東

南赤道外今在南河南赤道內二星南河南 天狗古

今同七星狼東北 三坐舊並在西北斜列今並在東

北斜列 丈人二星軍井西南 子二星丈人東 孫

二星在子東 天社古今同六星在弧南 天記古今

同一星外厨南 外厨舊近河又東西俠今去河遠臨

赤道又東西濶六星柳南 天廟舊並引行正直今有

曲直十四星在張南 東殿古今同五星在翼南

巫咸中官二

大尊舊在中台西子規外今在中台北子規內一星中
台北 三師古今同三星北斗魁第一星西 大理古
今同二星紫微宮門老星內 御女古今同四星鈎陳
後北 天相古今同三星七星大星北 長垣舊在黃
道外有二星今並在黃道內四星少微西南北列 虎
賁古今同一星下台南 軍門土司空二坐舊並在軫
星南今在軫星西南近翼 軍門二星青邱西 土司

空四星軍門南 陽門古今同二星庫樓東北 頓頑

古今同二星折威東南 從官古今同二星房星南

天輻古今同二星房星南 天輻古今同二星房距星

西 鍵閉古今同一星房東北 罰星古今同三星東

咸北列 列肆古今同二星天市中斛西北 車肆古

今同二星天市門左星內 帛度古今同二星宗星東

北 屠肆古今同二星帛度北 奚仲舊三星在虛度

一星入女度其星在子規外豎立今三星在牽牛度一

星在南斗度汭子規東南西北斜列四星如衡狀天津
北 鈎星古今同九星如鈎狀造父北 天桴舊在赤
道外今在赤道內四星河鼓左旗端南北列 天鑰古
今同八星南斗柄第二星西 天淵古今同十星在豔
東南九坎間一名三泉 齊一星九坎東衡星東北

趙二星在齊西北 鄭一星在趙東北 越一星在鄭
西北 周二星在趙東北 秦二星在周東 代二星
在周東南 晉一星在周西南 韓一星在晉北 魏

一星在韓北近秦星 楚一星在魏西南近鄭星 燕

一星在楚東南近晉星 秦趙等十二星座舊圖並須

女度今齊鄭趙越周等五座在須女度又列位不同

璃瑜古今同三星在代東南北外 天壘城古今同十

三星如貫索狀哭泣西 虛梁古今同四星在危南

天錢古今同十星在北落東北 天網古今同一星在

北落西南 斧鉞古今同三星在八魁西北 東廐舊

絡東壁距道又在河外今測絡奎距道仍北三星入河

不絡東壁距道十星東壁北近王良
天陰舊騎赤道
今測近黃道五車畢柄西

唐開元占經卷一百十

欽定四庫全書

唐開元占經卷一百十一

八穀占

唐 瞿曇悉達 撰

八穀生長

神農曰禾生於棗出於上黨羊頭之山右谷中生七十
日秀六十日熟凡一百三十日成忌於寅卯 黍生於
榆出於大梁之山左谷中生六十日秀四十日熟凡一
百日成忌於丑 大豆生於槐出於沮石之山谷中九

十日華六十日熟凡一百五十日成忌於卯 小豆生

於李出於農石之山谷中生六十日華五十日熟凡一

百一十日成忌於卯 秫生於楊出於農石之山谷中

七十日秀六十日熟凡一百三十日成忌於午 蕎麥

生於杏出於長石之山谷中生二十四日秀五十日熟

凡七十五日成忌於子 麻生於荆出於農石之山谷

中生七十日秀六十日熟凡一百三十日成忌於未午

辰亥日 小麥生於桃出於須石之山谷中生三百

日秀三十日熟凡三百三十日成忌於子 稻生於柳
出於農石之山谷中生八十日秀七十日熟凡百五十
日成忌於亥 五穀生長日種者多實以老死日種者
無實又難生以忌日種之一人不食 禾生於巳疾於
酉長於子老於戌惡於丙丁忌於寅卯 黍生於寅疾
於午長於丙丁老於戌死於申惡於壬忌於丑 豆生
於申疾於子長於壬老於丑惡於甲乙忌於丙丁 麥
生於酉疾於卯長於辰老於午死於巳惡於戌忌於子

太歲在四季葶藶子熟時可種禾豆夏至時可種黍麻

夏至後百五十日地氣上時可種麥

丑未戌是也

太歲在四

仲堪熟時可種禾豆夏至可種黍糜夏至後九十日地

氣上可麥

子午卯酉是也

太歲在四孟以蠶卧起時可種禾豆

夏至前五十日可種稻黍糜夏至後八十日地氣上可

種麥

寅申巳亥是也

八穀陰陽相衝

黃帝占曰穀有陰陽衝位相當王相廢休名在其鄉

黃帝要經曰春夏為陽秋冬為陰陰當合賤陽當合貴
春夏賤為順秋冬貴為逆 黃帝占曰稻與小麥為陰
陽稻賤時小麥貴十五日反之亦等 黍與小豆為陰
陽黍賤時小豆貴 麻與大麥為陰陽麥賤時大麥貴
大麥賤時小豆貴 麻與大麥為陰陽麻賤時大麥貴
大麥賤時麻貴 粟與大豆為陰陽粟賤大豆貴大豆
賤粟貴

候八穀貴賤及歲雜物蚕善惡

黃帝占曰粟嘗以建成之月下旬二十五日下價為本
以建亥之月上旬上價為末乘本貴之一錢以五并本
價以為來年春夏極貴定即亥月與戌月平者更以建
子之月乘亥月價見一貴之一貴之以三皆并本價以
為來年春夏極貴各在其衝月即冬三月皆不貴各平
平者來年春不復貴矣 泰常以建酉之月下旬二十
五日下午價為本以建成之月上旬上價為末本一錢貴
之以五并本價以為來年春夏極貴定即冬三月平平

者春夏不復貴 麻常以建戌之月下旬二十五日價
為本以建亥之月上旬價為末末乘其本一錢貴之以
五并本價以為來年春夏價定即冬三月皆平平者春
夏不復貴 大豆常以建亥之月下旬二十五日下

價為本以建子之月上旬上價為末末乘其本一錢貴
之以五并本價以為來年春夏極價定矣即冬三月皆
平平者春夏不復貴 麥常以建午之月下旬二十五日
下價為本以建未之月上旬上價為末末乘本一錢貴

之五并本價以為來冬春價極貴定矣夏秋三月平平者冬不復貴 師曠占曰常以正月一日迄十二日以

占十二月以日易月每歲黃氣其氣為差歲風從西來西南來皆為穀貴從東即穀賤 黃帝占曰正月上卯

日候風其有寒風者穀小貴若至衝必貴矣其卯日不風寒而溫者即中平也 春雨甲申五穀熟夏雨甲申

五穀大好 神農占曰正月上朔有風雨三月穀貴石

五百錢 黃帝占曰春雨甲寅乙卯入地五寸糴小貴

若不貴夏穀貴 正月丙丁為朔稔黍貴戊巳為朔粟

貴庚辛為朔麻稻貴甲乙為朔大小麥貴壬癸為朔大

小豆貴 正月三日當風不風則莫不同者謂無黍

東方朔占曰正月朔日雨歲中下田麥成禾黍小貴

沛公占常以正月甲辰先至大麥貴丙辰先至黍貴戊

辰先至粟貴庚辰先至大豆貴壬辰先至小豆貴 正

月一日得寅貴盡十二日以占十二月 黃帝占曰正

月晦二月朔有風雨稻惡羅貴二月晦三月朔有風雨

其年大水麥惡十二月晦正月朔風雨春旱三月晦四月朔有風雨春糴貴四月晦五月朔有風雨其年大水麥惡五月晦六月朔有風雨春旱六月晦七月朔有風雨春糴貴七月晦八月朔有風雨歲糴貴東方朔占曰三月得己朔大麥熟庚朔禾熟兵賊起辛朔下田不收壬朔赤地千里米穀貴癸朔熟三月有三卯大豆好無三卯旱種禾四月丙午夏苗長四月無三卯旱種麻京房占曰五月無三卯旱種大豆六月無三卯

祭不好 神農占曰八月有三郊麥大善無三郊麥不
善 京房占曰八月無三郊旱種麥 黃帝占曰四月
朔日風起東來雞鳴至日出禾黍畝三斛至日中畝二
十斛至夜半畝三十斛以中田准之 黃帝占曰夏至
以五月朔日至者其國大驚穀小貴四月五日六日至
者穀大貴十日十二日至者五穀大貴二十七日二十
九日至者國王大驚以晦日至者國有大喪六月朔至
者人民相食及五年事四月至上又云夏至在天門土

國大驚在地戶谷雨五穀大貴在人門為三公羣臣大
夫穀貴必察之二日之中又五六月晦朔日夏至者賣
田宅穀貴十倍人民相食其歲惡田宅雖賤慎勿取之
立夏戊子大風自北來糴石三百倍貴 黃帝要經
曰春雨乙卯夏糴貴夏雨丁卯秋糴貴秋雨辛卯冬糴
貴冬雨癸卯春糴貴倍雨一卯斛百文雨二卯斛二百
雨三卯斛三百雨四卯斛一斤金 沛公占曰三月一
日乙卯荆楚賤得丁卯周秦貴得己卯燕趙貴得辛卯

韓魏貴得癸卯梁魯貴 神農占曰凡蟲食李則黍貴

食棗粟貴食杏麥貴食荊麻貴食桑絲貴 正月上朔

日風從東來植禾善風從南來植黍善風從北來植禾

善四月四日風從東來植豆善西來四日至七日中善

七日至十日稚禾善十四日無風不可種豆從東至日

到來年滿六十日有大風雨折樹木麥大善從平朔至

食時植麥善至日中中麥善至日入稚麥善常以夏至

後九十日可種 四月朔日風從東來從平明至辰時

植黍善至日中中黍善至日入稚黍善 正月朔日

日清明蚕善 京房占曰正月一日候風平明和調不

風植稼蠶善日中和調中稼稚蠶善至暮無風五穀桑

蠶滋茂人民六畜無病 沛公占曰正月一日平明溫

不風早蠶善日中不風中蠶善日入不風稚蠶善終日

不風植稚皆善 東方朔曰正月朔日當溫更風雨者

米大貴蠶傷風起西方來年兵革貴 京房曰太歲在

寅歲中三十日大陰蠶不登菽麥昌人民食四升 太

歲在卯中調和豆麥昌人民食五升旱四十日在六月
太歲在辰歲中旱三十日六月大風旱六十日歲人
病豆成 太歲在巳小兵起大麥登四十日旱在六月
百物賤不宜早蠶晚者成五穀熟 太歲在午五百日
旱蠶登百穀不為晚蠶傷兵草起六畜小兒死 太歲
在未十月小兵豆登麥惡旱蠶不成晚者好旱六十日
在二月 太歲在申蠶登麥熟五穀旱五十日人多病
兵草起旱蠶不成晚者好 太歲在酉兵起人病早蠶

不登晚者好六畜傷六月七月旱 太歲在戌兵起蠶
不登肉賤牛馬貴高山旱人飢米斗七十文 太歲在
亥兵起人飢人多病憂在四十日在州旱七十日豆麥
好五穀成蠶子如星 太歲在子水旱不時五穀不成
旱三十三日在六月西方米麥暴貴 太歲在丑有兵
起早蠶不成晚者好人民不安 黃帝占曰太歲在亥
名曰天空糴法當貴 太歲在丑名曰陰盡陽起可取
陽穀陽穀者粟也 太歲在巳名曰地空糴法當貴

太歲在未名曰陽盡陰起可取陰穀陰穀者黍也 太

陰乘寅早水晚旱蠶未菽麥昌人食四升 太陰乘卯

禾稻菽麥黍昌人食二升 太陰乘辰早早晚水人飢

豆昌麥熟民食二升 太歲乘巳小兵動蠶麥昌二升

太陰乘午大旱蠶成稻菽麥昌禾不為二升 太歲

乘未小兵起蠶稻昌菽麥不為三升 太陰乘酉大兵

民疫蠶菽麥皆不成民食七升大耗 太陰乘亥有兵

麥禾善五升 太陰乘子天大霧歲水大出稻麥蠶禾

昌民食三升 大陰乘丑歲小兵早蠶不登稻疾菽不成麥昌民食三升 黃帝占曰正月一日二日雨民食二升三日四日雨民食四升五日六日雨民食六升七日八日雨民食一升十日雨不占 師曠占曰正月七日風從西北來起荆地弱來人民霖變訟六畜貴穀亦貴過度歲不善 京房占曰正月初一日為雞二日為狗三日為羊四日為猪五日為牛六日為馬七日為人八日為穀和調不風寒即人不病六畜不死亡 郝萌

曰常以正月朔日暮候東井上有雲歲水潦務耕山田
高處 東方朔曰常以正月一日夜半子時候東方有
黃色雲者春大赦南方有黃雲者夏有赦西方有黃雲
者秋有赦北方有黃雲者冬有赦雜者皇太子有赦有
黑雲雜者必有皇后若女子之赦 京房易占曰正

月一日雲氣五色脩且精神十二律氣各具歲則天下
太平風雨從西北起糴貴 神農曰正月有甲子糴初
貴後賤 沛公曰正月甲寅先至棺木貴丙寅先至絲

帛貴壬寅先至魚鹽貴各三倍 正月朔日大風發屋

折木揚沙動石其歲惡風從東方來人民多疾病風從南方來大旱風從西方來六畜死亡傷風從北方來下田不收高田好 常從冬至後却數到來年正月上旬滿五十日食足不滿一日之月過一日長一月 神農曰正月上辛溫者善風寒者不好 黃帝占曰常以正月八月夜候月在昴東年中大喜月在昴西歲多雨月在昴北其年大惡月在昴南其年大旱 京房曰正月

八月候月在參東大善在參西多水蟲在參北大惡

黃帝占經曰春不欲雨乙卯夏不欲雨丁卯秋不欲雨

辛卯冬不欲雨癸卯以此四卯日雨者人民多病 黃

帝占曰常以正月一日夜半子時至明視北方有黑雲

七月水四丈七尺青雲必有疾病流行燕趙當之赤黃

雲人民大飢國多刑獄白雲素服之變赤雲國有喜母

子同光女有昌視南有赤雲當大旱赤地千里五月炎

旱六月有風雨發屋折木并白雲國有大喪天子失喪

坐有黑雲大水不出其年五月有青雲者大吉婦女謀
內視西方有白雲秋有兵內相走宮鐘不鳴劒戟交鋒
有青雲大凶君克臣必死物在市不出其年九月黑雲
者大吉利 秋雨甲申六畜多死冬雨甲申人民疾病
九月晦十月朔有風雨其歲惡有小水十月晦十一
月朔有風雨人民多死四月一日二日得酉人民大樂
三日四日得酉人民悅和五日六日得酉人民多疾病
七日八日得酉人民多病九日十日得酉人民多流十

一日十二日得酉人民自相食大凶 京房曰五月朔
日當熱而風雨者米貴人食草木風從北方來禾大敗
人民相食 黃帝占曰立夏後五日虹始出者萬物皆
實 冬至後一日二日得酉其歲半熟三日四日得酉
人民大樂五日六日得酉田禾大熟七日八日得酉大
惡九日得酉五穀大貴十日十一二日得酉五穀大成
傷害六畜寇賊多興十三日得酉人民相戰大凶災八
方俱沸沸酉者金兵之本收成之元首 京房曰冬至

後一日有壬無雨二日有壬稚再生三日四日有壬上
下皆熟五日六日有壬溝渠溢苗易治七日八日有壬
水橫流九日十日有壬無立牆過十日有壬還一等至
後三日七日有壬苗難治 黃帝占曰青車木位甲寅

之精不周風至一日賊風至棺木貴葦席賤廣莫風至
材木貴葵韭賤條風至葱薤賤藟藿貴明庶風至桮朽
賤蒲席貴清明風至棺木賤葦席貴景風至材木
賤葵韭貴涼風至藟藿賤葱薤貴闔闔風至蒲席賤桮

朽貴 火車丙寅之精不周風至泉麻絡賤黃白綠貴廣
莫風至纁縷賤錦綉貴條風至布縷賤緇帛貴明庶風
至綿皮草賤絺絮貴清明風至黃白綠賤泉麻絡貴景
風至錦綉絺賤纁貴涼風至緇席賤布縷貴閭闔風至
絺絮賤綿皮草貴 土車戊寅之精不周風至稻賤秫
麥貴廣莫風至小荳賤黍貴條風至大豆賤粟貴明庶
風至大麥賤麻縑貴清明風至秫與小麥賤稻貴景風
至黍賤小豆貴涼風至粟賤大豆貴閭闔風至麻縑賤

大麥貴 金車庚寅之精不周風至鐵器賤鉛錫貴廣莫
風至膠漆賤黃金貴條風至珠璣賤銅器貴明庶風至
玉器賤田宅貴清明風至鉛錫賤鐵器貴景風至黃金
賤膠漆貴涼風至銅器賤珠璣貴閭闔風至田宅賤玉
器貴 水車壬寅之精不周風發鹽豉賤海錯貴廣莫
風至雞犬賤鯉魚貴條風發猪狔賤生魚貴明庶風發
牛馬賤羊羔貴清明風發海魚賤鹽豉貴景風發鯉魚
賤雞犬貴涼風發生魚賤猪狔貴閭闔風至羊羔賤牛

馬貴凡五寅之風所從吹本鄉來之處賤風往所衝之處為貴一日分出時終日貴在六十日從日入至夜半貴在二旬中從夜半至雞鳴平明貴在一時常以庚寅之日候五車金星動故有耗其物金鐵貴動而不明即貴有大風寒折木發屋即大貴大風寒大貴小風寒小貴其溫即賤不風寒自如常以壬寅之日候五車水星主船筏六畜水中自行者故水車星動微黑即貴水物有大風寒折木發屋者大貴大風寒大貴小風寒

小貴不風寒自如 常以甲寅之日候五車木星立柱
材木苗蘆薪苛茅故木車星動微青即貴有風寒折木
發屋大風寒大貴小風寒小貴其溫即賤不風寒自如
常以丙寅之日候五車火星主蟲采繒帛皮草色赤
動即貴有大風發屋折木大風寒大貴小風寒小貴其
溫即賤不風寒自如 常以戊寅之日候五車土星主
土公田宅五穀其星赤黃有柱動即穀貴有大風寒發
屋折木大風寒大貴小風寒小貴溫即賤不風寒自如

唐開元占經卷一百十一

欽定四庫全書

唐開元占經卷一百十二

竹本草藥占

唐瞿曇悉達撰

草木休徵

朱草

孫氏瑞應圖曰朱草者草之精也聖人之德無所不至則生 鶚冠子曰惟聖人能正其音調其聲故德上及泰清下及泰寧中及萬靈朱草生 尚書大傳曰德光

地序則朱草生 淮南子曰太清之世流黃出朱草生
春秋運斗樞曰璇星得則朱草生 尚書侯曰文命
得成俊又在官朱草生郊 魏畧曰文帝欲禪朱草生
於文昌殿側 大戴禮曰朱草生日生一葉至十五日
止十六日落一葉

嘉禾

春秋感精符曰德淪於地則嘉禾生 春秋運斗樞曰
璇星得則嘉禾液

福草

禮斗威儀曰君秉木而王福草生於廟中 瑞應圖
曰福草者宗廟齋敬則生宗廟中

芝草

運斗樞曰瑤光得則陵出芝草 瑞應曰芝草者親近
耆老養有道則生 地鏡曰敬事耆老不失舊故則芝
草生

禾連理

地鏡曰不失民心則木連理生

木同本異枝

京房曰有木同本而異枝是華光國有吉昌五穀登他
民歸國 京房傳曰樹同本異末君有慶諸侯朝

木卒長

地鏡曰國治樹木卒長自大其君方有嘉 京房易傳
曰木成員圍以上一夜長數丈當有臣強於君

木生君屋上及朝廷

地鏡曰木卒生人屋室上其地出聖人 京房易傳曰
木生於君屋上及朝廷其君有聖子

木生木及木垂枝

地鏡曰木生木國益土 又曰木生枝盡向下者大吉
木偃自起及木生有實

京房曰有偃木而起歲有大吉 木生有實其邑有慶
竹木咎徵

竹木自死疾疫非時枯落

地鏡曰竹栢枝遍一百里是謂陰消陽國必亡 又曰
竹栢夏枯王侯失位 又曰樹木非其時而枯是謂金
尅伐不出一年暴兵外國來 又曰凡樹忽生死主易
兵將至 又曰社樹自死世主國君亡 京房曰有木
夏落葉有兵喪 京房易侯曰秋葉落七十步人民移
徙大飛揚人民離鄉 地鏡曰木葉非時落去本七十
步國有兵民棄故鄉

木生復死

京房易侯曰枯楊生萑斷枯復生天辟當之 地鏡曰
竹葦樹木枯死忽復生輔臣執政流其令 又曰枯木
冬生易謂陰陽易位不出二年國有喪小人近君子亡
又曰木實當死者反生世主凶 京房易傳曰木枯
而生不及二年國有大喪上貪色以寵人為主 又曰
枯楊生花國后當之

木冬榮

地鏡曰木冬生有兵民流一曰君失政 又曰木冬華

當生反死 京房曰木冬生王者不平有卿相出走
又曰有木冬榮黍不成 又曰木冬生國后當之

木再榮

地鏡曰木一歲再花實有兵民流 又曰木再榮世主
墮手姬女致兵之象 又曰桃再花夏有霜杏再花夏
有電李再花春有霜榆再莢有寬令當死反生 又曰
木春冬再作實世主凶秋夏再花實隣國逼之 京房
曰木歲再花國后當之 又曰木一歲再實隣國來其

國又曰木再榮於夏后亡國有喪若五穀不熟百姓
罷作

桑穀自生朝廷及木生不入土

地鏡曰桑穀俱生於廟廷世主廢賢用不肖又曰木
生不入土而獨立天下危

木卒生道中及木卒枝

地鏡曰木卒生道中君失治九宮廢又曰木無故一
夜十枝叢生邑將虛

木傷葉及木自鳴

地鏡曰木生一枝偏無葉歲惡民飢 又曰木忽自鳴
主死自鳴作金聲者主地方分裂

木哭泣及出血并生齒

地鏡曰樹木泣天下有兵 京房飛侯曰樹哭實邑虛
虛邑實 地鏡曰木無故血出及汁流出地邑敗有兵
京房曰伐木有血侯王有憂 又曰林木生齒有兵起
榆莢不落

京房曰榆莢不落國受大咎

竹實反枝


地鏡曰竹實衆鳥羣行不出二年大飢 又曰竹忽實而枯主易民飢 又曰國中竹皆盡枯地失

黍稷生疣

京房易傳曰黍生疣大君有憂相去亡稷生疣大君憂大臣死

蓬葉生

京房易傳曰蓬葉繁興歲不熟



唐開元占經卷一百十二

欽定四庫全書

子部

唐開元占經卷一百十三

四

詳校官中書

臣李采

靈臺郎

臣

倪廷梅覆勘

總校官編修

臣王燕緒

校對官中書

臣王慶長

謄錄監生

臣龔際英

欽定四庫全書

唐開元占經卷一百一十三

唐

瞿曇悉達撰

人及神鬼占

人名體

春秋說題辭曰人者仁也以心合也

宋均曰與他相偶合也

易

曰立人之道曰仁與義春秋繁露曰人有三百六十

六節耳目之明日月之象外有四支副時數也乍視乍

瞑副晝夜也乍哀乍樂副陰陽也 白虎通曰人有五藏六府所應五行六合也 大戴禮曰天地人一二三三三九九八十一生日日數十故人十月而生人生晷晷然後行三年頭然後合焉 孝經援神契曰頭圓法天足方象地五藏象五行四支法四時九竅法九州兩目法日月肝仁肺義脾信心禮膽斷腎智旁光須髮象星辰節象月歲腸法經緯

人瑞

真人

禮斗威儀曰君乘土而王其政太平黃真人游於後池

宋均注曰黃土色遊於後宮之池則黃帝問道於玄女素女是也

孫氏瑞應圖曰真

人者黃帝時遊於池王者著德不貪貨利則金人乘金船遊王後池又曰王者德至則金人遊於池

玉女

禮含文嘉曰禹卑宮室盡力溝洫百穀用成玉女敬降

養

宋均注云玉女有人如玉色也天降精生玉女使能養人美女玉色養以延壽也

賢聖進

春秋繁露曰君恩及僇蟲城郭充實則賢聖皆進 鄭
玄注論語云周公相成王致太平時四乳而生八子皆
有賢行和氣之所致也

長人見

魏志曰咸熙二年晉太子昭封襄武縣言有大人見長
三丈餘跡長三尺二寸白巾著黃單衣黃巾拄杖或云
今當太平

人恠

長人入國

京房曰君暴亂疾有道厥妖長狄入國 左傳文公十

一年敗狄於鹹穀梁公羊傳曰長狄也兄弟三人一者

之魯一者之齊一者之晉煞之身橫九畝

五丈四尺

斷其首

而載之眉見於軾何以書記異也劉向以為時周室衰

微三國為大可責者也天戒若曰不行禮義大為夷狄

之行將致危亡其後三國皆有篡逆之禍近下人伐上之

病也 史記秦始皇帝二十六年有大人長五丈足跡

六尺皆夷狄服凡十二人見于臨洮天戒若曰大為夷狄之行將受其禍是歲秦始皇初并六國反意以為瑞銷天下兵器作金人十二像之自言賢聖燔詩書坑儒士奢媼暴虐務欲廣地南戍五嶺北築長城以備胡越塹山填谷西自臨洮東至大遼東西徑數千里故大人見於臨洮明禍亂之起也後十四年而秦亡

人走入宮室

春秋潛潭巴曰有人入宮之禍極效之驗也 又曰有

人走入宮不知其名大水為災國驚羣猾並謀 漢書

五行志曰成帝建始三年七月丁未渭上女子陳持弓
年九歲言大水至走入城入未央宮尚方掖門殿門門內
諸衛戶者莫見至鉤楯省乃見民驚走上城此下將篡國
因女寵有宮室之象也後王氏兄弟父子五侯秉權至
莽卒篡天下 又曰成帝綏和二年八月庚申鄭通里
男子王褒衣絳衣小冠帶鉤入北司馬殿東門上前殿
入非常室解帷組結佩之曰天帝令我居此署長業等

叔縛考問褒故公車大誰卒

應劭曰在司馬殿門掌謹呵也

病狂易不

自知入宮後王莽篡之象

續漢書云靈帝光和中雒

陽男子以弓箭射闕北吏叔考問辭居貧負責無所聊

生因買弓箭以射闕近射妖也其後車騎將軍何苗與

兄大將軍進部曲相疑對相攻擊戰於闕下苗死敗殺

數千人雒陽宮室因火延燒盡風俗通曰靈帝光和

元年南宮中黃門寺有一男子長九尺白衣中黃門吏

呵問汝何等人白衣妄入宮曰我梁伯夏天使我為天

子吏欲收取忽不見董卓之應也 王陵晉書惠帝紀

曰齊王冏為大司馬十二月有白頭老公入司馬府大呼有大兵起不出甲子旬即收都衛考竟殉於內外

演晉漢春秋曰齊王冏輔政大安元年有一婦詣大司馬門求寄產吏乃詰之婦曰待我截臍便去言訖不見有位者聞而惡焉至二年而冏被誅

訛言

漢書王莽傳曰建國元年長安狂女子碧呼道中高皇

帝大怒趣歸我國不者九月殺汝莽收捕殺之 幽州

錄曰吳郡張茂度在益州時忽有人道朝廷誅徐羨之
傅亮謝晦三人遂傳紛紜張推問造言之主問何由
言此荅曰實無所承恍惚不知言之耳張鞭之傳者遂
息後乃驗日月正與符同 沈約宋書曰大明二年民
築治廣陵城劉誕出巡行有人揚聲大罵曰大兵尋至
何以辛苦百姓使執之問其本末荅曰夷姓名孫家在
海陵天公與佛道共議欲燒此間人民道佛苦諫強得

至今大禍將至何不立六慎門誕問六慎云何答曰古
言禍不過六慎門誕以其言狂悖殺之又五軍士忽狂
見鬼驚怖啼哭曰外軍圍城城上張白布帆執錄二十
餘日乃散築城之日雲霧晦暝白虹臨門連蜀城內

童謠

漢書五行志曰言之不從是謂不義時則有詩妖君亢
陽而虐臣畏刑而箝口則怨謗之氣發於歌謠故有詩
妖 鴻範五行傳曰下既非君上之刑畏嚴刑而不敢

正言則先發於歌歌口事也氣逆則惡言至或有恠謠
以此占之故曰詩妖古者人君必視人民聽其歌謠以
省國政 左傳曰僖公五年晉侯伐虢八月甲午圍上

陽問卜偃曰吾其濟乎對曰克之公曰何時對曰童謠

有云丙之晨龍尾伏辰

龍尾尾星也日月之會曰辰日在尾故尾星伏而不見也均

服振振取號之旂

戎事上下同服振振盛貌旂軍之旌旗也

鶉之賁賁天策

煇煇火中成軍號公其奔

鶉鶉火星也賁賁鳥星之體也天策傳說星時近日星微

煇煇無光耀也言丙子平旦鶉火中軍事有成功也此已上皆童謠言也童子未有念慮之感而會成嬉戲之言

似若有憑者其言或中或否博覽之士能懼思之其九人兼而志之以為炯戒以為將來之驗有益於世教

月十月之交乎

以星驗之知九月十月之交謂夏之九月十月也交晦朔交會

丙子旦日在

尾月在策

是夜日月合朔於尾月行疾故至旦而過在策

鶉火中必是時也冬十二

月丙子朔晉滅虢虢公醜奔京師

周之十二月夏之十月也

左傳

曰文成之世童謠曰鸛之鵒之公出辱之鸛鵒之羽公

在外野往饋之馬鸛鵒踈踈公在乾侯徵褰與襦鸛鵒

之巢遠哉搖搖稠父喪勞宋父以驕鸛鵒鸛鵒往歌來

哭至昭公時鸛鵒來巢公攻季氏敗出奔在外野次乾

侯八年薨於外歸葬魯昭公名稠公子宋立是為定公
異苑曰秦世有童謠云秦始皇奄僵僵開吾戶據吾
床飲吾酒唾吾漿食飲以為糧張弓射東牆前至沙丘
當滅亡始皇既坑儒焚典乃發孔子墓欲取經傳壙既
啓悉如謠者之言又言謠文藏在冢壁始皇甚惡之反
問之還沙丘而脩別路見羣小兒輦沙為阜問之云沙
丘也從此得疾而殂漢書五行志曰元帝時童謠云
井水溢滅竈烟灌玉堂流金門至成帝建始二年三月

戊子北宮中井泉水溢出南流象春秋時有鸛鵒之謠
而後有來巢之驗井水陰也竈烟陽也玉堂金門至尊之
居象陰盛而滅陽竊有宮室之應也王莽生於元帝初
元四年成帝封為三公輔政因以篡位 又曰成帝時
童謠曰燕燕尾涎涎張公子時相見木門倉琅根燕飛
來啄皇孫皇孫死燕啄矢其後帝為微行出遊常與富
平侯張放俱稱富平侯家人過河陽公主作樂見舞者趙
飛燕而幸之故曰燕燕尾涎涎美好貌也張公子謂富

平侯也木門倉琅根謂宮門銅鍰

服虔曰門銅樞也應劭曰門銅鋪首鍰也

蘇林曰鍰音鏐

言將尊貴也後遂立為皇后弟昭儀賊害後宮

皇子卒皆伏辜所謂燕飛來啄皇孫皇孫死燕啄矢者

也又曰成帝時童謠曰邪徑敗良田讒言亂善人桂樹

花不實黃爵巢其巔昔為人所羨今為人所憐桂樹亦

色漢家象花不實無繼嗣也王莽自謂黃象黃爵巢其

巔象也續漢書曰更始時南陽有童謠曰諧不諧在赤

眉得不得在河北是時更始在長安世祖為大司馬平定

河北更始大臣並見煞是更始之不諧在赤眉也世祖
由河北興 又曰世祖建武中蜀童謠曰黃牛白腹五
銖當復是時公孫述僭號於蜀時人竊言莽稱黃述欲
繼之故稱白腹五銖漢家貨明當復也述遂誅滅 又
曰順帝之末京都童謠曰直如弦死道邊曲如鉤反封
侯案順帝即世孝質短祚大將軍梁冀貪樹䟽幼李固
以為清河雅性聰明敦詩悅禮加以屬親立長則順置
善則固而冀私白太后策免固因徵蠡吾侯遂即至尊固

由是結怨幽斃於獄暴尸道路而太尉胡廣封安樂鄉侯司徒趙戒厨亭侯司空袁陽安國亭侯又曰桓帝之時京都童謠曰城上烏尾畢逋父為吏子為徒一徒死百乘車車班班入河間河間姪女工數錢以錢為室金為堂石上慊慊春黃梁梁下有懸鼓我欲擊之丞卿怒案此謠皆謂為政貪也城上烏尾畢逋者處高利獨食不與下共謂人主多聚斂也父為吏子為徒者言蠻夷將叛逆父既為軍吏其子又為卒徒往擊之也一徒死百乘車

者言前一人往討廣既死矣後又遣百乘車往也車班
班入河間者言桓帝將崩鑾輿班班入河間迎靈帝也
河間姪女工數錢以錢為室金為堂者言靈帝既立其
母永樂太后好聚金錢以為堂室也石上慊慊春黃梁
者永樂雖積金錢猶慊慊常若不足使人春黃梁而食
之也梁下有懸鼓我欲擊之丞卿怒者永樂教
靈帝使賣官受錢所祿非其人天下忠篤之士怨望欲
擊懸鼓以求見丞卿主鼓者亦復諂順怒而止我也 又

曰獻帝踐祚之初京都童謠曰千里草何青青十日卜
不得生紫千里草為董十日卜為卓青青暴強之貌不
得生者亦旋破亡也魏畧曰令狐愚字公治太原人
為兗州刺史愚見吳未平而齊王芳年少又聞楚王有
智勇初東郡有謠云白馬出河妖馬夜過官叔鞠嗚呼
衆馬皆應明日見跡大如斛行數里還入河中又有謠
言白馬素羈西南馳其誰乘者朱虎騎愚既聞此謠又
聞大司馬楚王小字朱虎故遂與其舅王陵陰謀立楚

王愚病死後發覺刀割愚棺而戮尸焉 吳志曰初興

年中吳中童謠曰黃金車斑斕昌門出天子昌門吳西
郭門也夫差所作也其後孫氏興焉異苑曰義熙中童
謠云長作掃帚樞作杷掃除洛中迎瑯琊及十一年晉
大軍至洛修復園陵時封琅邪王也 中興徵祥說曰

大和中童謠曰青青御路楊白馬紫縷韁汝非皇太子
那得甘露漿又曰鳳凰生一雛天下莫不喜本言是馬駒何
悟成龍子是時海西公寵愛殿中常侍相龍等因共為

亂生子男三人海西以為已子將欲立之既而被廢以馬韁殺三子三子死之明日南方獻甘露焉

中興徵祥說曰隆和中謠曰升平不滿斗隆和那得久哀皇聞而惡之改為興寧又謠曰雖復改興寧只自無聊生尋哀帝中藥不識萬幾異苑曰石勒末年謠曰一杯水食者旨石勒死人不知不信我語視鹽池三月忽變而生渥七月而勒死池還如先又曰符堅域中謠曰河水濁復清符詔死新城又謠曰肩不過項及

其南侵其相王猛諫曰童謠有云肩不過項此不宜遠行之徵也不從果敗於壽春之項城

人生角及自出地

京房曰權臣專政厥妖人生角 漢書五行志曰景帝二年九月膠東人年七十餘生角角有毛角兵象老人吳王象也年七十七國象也時膠西濟南臨淄膠東四王謀反連楚趙凡七國 華陽國志云李勢未亡之前涪陵有民頭生角長三寸凡三截之 京房易傳曰人

自地出君有憂民散流國亡地

男化為女

春秋潛潭巴曰小人聚天子弱則丈夫化為女子 京
房曰丈夫化為婦人茲謂柔勝強陰勝陽邦必亡又曰
男化為女有異姓來其國 蜀王本紀曰武都丈夫化
為女子顏色美好蓋山精也蜀王取為后后死蜀王於武
都擔土於成都葬之故地號曰武擔以石鏡一表其墓
漢書五行志曰哀帝建平三年豫章有男子化為女

子嫁為人婦生子長安陳鳳言陽變為陰將無繼嗣自相生之象生一子將復一世絕也

女化為男

春秋潛潭巴曰賢人去位天子獨居則女化為丈夫

京房曰女子化為男子茲謂陰昌賤人為政其邦必亡

又曰君將絕嗣則君妻化為男 紀年曰晉定公二

十五年西山女子化為丈夫與之妻能生子其年鄭一

女生四十人二十人死 史記曰魏襄王三年魏有女子

化丈夫 續漢書五行志曰獻帝建安七年越雋有女子化為男子時周羣上言哀帝時亦有此將有代易之事至二十五年帝封山陽公

人生而能言

京房易傳曰言之不知則人生而能言天使代其言也 又曰人生而能言言善則善言惡則惡此國之徵 地鏡曰多有讒賊人生而言

人生而能行

京房曰人生而行其國大昌其君有憂 又曰自受其
殃黔首散亡 地鏡曰王事急民欲流亡國有兵則人
生而能行

人相食

續漢書五行志曰靈帝建寧三年河內婦食夫河南夫
食婦 異苑曰後漢桓帝元嘉元年任城民婦生兒即
自取食之又謂姑曰天使如此我亦行死尸僵者門閭
安敬者失半覆則盡滅言畢而匍匐復產一兒而兩頭

五人楊難自王仇池分國之應也

人生子異形

天鏡曰婦女一時生三男不出三年外國來生三女國
有陰私 春秋潛潭巴曰人生五首猾大起 京房曰
人生子首在背天下易鄉 天鏡曰人生兩首不出三
年上帝命王征四方布令天下 又曰人生四頭兩目
世主大哀人生多頭君王有咎民顛沛流亡 地鏡曰
天下憂主凶民流亡則人生有四目 天鏡曰人生三

目橫兵並起為害 京房曰人生子有一目其國不寧

春秋演孔圖曰崇高將亡陰不承陽怨望生則十口

之人出 京房曰人生有二口以上國主見驚以兵

天鏡曰人生兩口五穀不登百姓喪亡 京房曰人生

子舌長天下有兵 人生子有一耳是謂不聰 人生

有三耳以上是謂多方其國無王 又曰是謂多聰國

事無定 人生子有一手是謂不壽其國有咎 人生

有三臂有反臣 人生有三手以上臣謀主 人生三

足是謂非常天下有兵 天鏡曰人生多足是謂大役
其國東西移走 人生有三足不出二年國有兵喪

京房曰人生子有一足是謂不行國主亡 人生子有

三十指民流亡 人生子有二鼻有民謀其主 人生

有二背臣反主亡 天鏡曰人生兩身世主被殃民人

散亡 人生兩腹不出三年歲大熟民食足 京房曰

人生子有三腹其國分 人生有二腹是謂惡祥國主

以仇亡 人生子目在首上及後天子亡 天鏡曰人

生目著腹五穀豐橫兵起 京房曰人生子目在項背

天子不安 人生子目在臂及手天下有大事 人主

子目在腋天下不相見 人生子目在陰天子亡位

人生子目在踵及足是謂下視天下大兵 人生子

口在首上及在後國主亡 天鏡曰人生子兩口在背

國無兵人民行五穀昌 京房曰人生子口在肢臣主

亡 人生子口在腹旁天下有兵一曰為天德五穀豐

熟 人生子口在節天下民大飢流亡 人生子鼻在

背及項天下不寧 人生子鼻在首前太子有殃 人

生子鼻在腹天下大荒 人生子鼻在四肢節天子亡

人生子鼻在陰是謂不恒天子降 人生子耳在首

上及前後天下有兵民流亡國君喪 人生子耳在腹

天下兵 人生子耳在背及肩項天下有憂 人生子

耳在四肢及手足有反主者 人生子腹在背天下飢

人生子腹在手上前後天下民飢兵作 人生子腹

在四肢足天下有大兵又曰天子易 人生子四肢在

背天下亂於兵 人生子陰在首天下大亂在背天子
無後 人生子陰在腹天下有大事 京房易侯曰人
生子足小此謂下約不出三年邦消亡 漢書五行志

曰平帝元始六年六月長安女子生兒兩頭異頸面相
向四臂共胷尻上有目長二寸所若六畜首目在下茲
謂亡上政將變更凡妖之作以譴失正各象其類二首下不
一也手多所任邪也足少下不勝任也 風俗通曰靈帝
光和二年洛陽上西門外女子生兒兩頭異肩四臂共

冒俱前向以為不祥隨地棄去朝廷變亂上下無別二頭之象也 春秋運斗樞曰人主不省山川之祠州土之位不應天府斬伐無度懷山絕渠則人生大頭 天鏡曰人生子頭如囊者主有咎凶 又曰人生頭大不出三年將有大師來伐其國 又曰人生無頭世主方凶 京房曰人生子無目其國主暴死 人生子無口其國主見賊 又曰多疾 春秋運斗樞曰上契下塞則人無唇 京房曰人生子無唇是謂不祥國主死亡 人

生子無耳天子不聰 天鏡曰人生而無口鼻耳世主
凶其國年熟 人生子無鼻其國主疾病 人生子無
足歲大飢 人生子無手主有客兵至 人生子無手
掌世主大憂疾病 人生無足世有喪徵也 人生無
足不出三年其國空 京房曰人生子無指天子有更
令 人生子無腹其國年大熟 人生子無四肢其國
主君臣有反者 人生子無陰其國主無后 人生子
無尻國主以仇亡 天鏡曰人生子無頭不出三年有

大師來伐其國 人生子無骨其國主昌 魏志公孫
述時襄平北市有人生肉長圍各數尺有頭目口喙無
手足而動搖此赤眚也占曰有形不成有體無聲其滅
亡必也

人生六畜

京房曰人生六畜是謂更有王天下易主 人生馬百
姓勞苦 人生彘犬人君失道 人生彘貴人牽義民
不義 人生六畜形人面者天子不聰 人生六畜口

在手之上及腹天下有大兵 人生六畜口在腹背胷
天下有反者 人生子人形六畜面更天子 人生六
畜口在陰天下有惡天子 人生六畜耳在手上下
有憂又云有反者 人生六畜耳在四肢天下有兵一
曰天下大荒 人生六畜耳在腹及胷天下有反臣
人生六畜耳在陰羣臣常謀天下 人生六畜四肢在
腹及首天下大亂 人生六畜有三首以上天下樂昌
人生六畜有兩身天下有重兵 人生六畜有三目

以上天下有亂臣 人生六畜有一目國令不行 人生六畜有兩口以上天下有兵 人生六畜有三耳以上天下有大事 人生六畜有一耳國主不聰 人生六畜有兩鼻以上有謀反者 人生六畜有一足天下無主 人生六畜有二足天下有大憂 人生六畜陰在首上天子失位 人生六畜有二陰以上國主多子 人生六畜有四肢無節天下有不善者 人生六畜有二尾以上國有大事 人生六畜有毛無羽天子失位

人生六畜有羽無毛天子無朝之者 人生六畜身

半有毛半無毛國有大事 人生六畜無面天下兵作

人生六畜無首天下無主天子失位 人生六畜無

目社稷亡 人生六畜無口天下大飢重有大兵 人

生六畜無鼻天下有災 人生六畜無耳天子無令臣

人生六畜無腹天下大飢重以大兵 人生六畜無

四肢天子無忠臣 人生六畜無陰天子無後 人生

六畜無骨筋肉天下昌 人生六畜無尾是謂無後近

臣反殺主 人生六畜無毛天下貧民飢 地鏡曰兵起則人生牛馬

人生野獸飛鳥

天鏡曰人生野獸國君兄弟分別不出一年夷狄內侵
京房曰人生野獸天下不通 人生野獸有他變形
天下大兵凶亡 京房易侯曰人生飛鳥茲謂不祥司
馬將兵上卿亡 人生子形如飛鳥面者非常兵行
人生子人面飛鳥形者大水行兵戰 人生飛鳥有人

形體者天下分 天鏡曰人生飛鳥君憂小民散流

人生五穀草木雜物

京房曰人生子盡為五穀國民昌 人生子盡為草木
國主死 人生子盡為石兵強 人生他物非人所見
聞者皆為天下有兵

人生龍蛇虫魚

地鏡曰國君見伐則人生龍 京房曰人生龍有異姓
來相其國君將亡 人生子人面而龍蛇形者天下有

兵紀年曰令王四年碧陽君之諸御產二龍 人生
子人形而龍蛇面者天下飢其兵合 人生蛇蜂蠱天
下有并民 人生蛇蜥蜴國破有喪君走 人生子魚
為首者有大水

人死而更生

天鏡曰人死復生國有大病五穀死兵起 京房曰子
不三年改父之道則為私厥妖人死更生左傳曰晉殺
秦諜於絳七日復生 續漢書五行志曰獻帝初平中

長沙人姓桓死棺斂月餘其母聞棺中有聲發之遂生
至陰為陽下人為上其後曹公由匹庶起也 又曰獻
帝建安四年武陵宛縣女子李娥年六十餘死於城外
已四十年行人聞塚中有聲發出遂活 京房易傳曰
死人復行五穀不登兵革大起

女生赤毛

京房易傳曰人君尊卑無別則女生赤毛

神瑞

西王母

帝王世紀曰舜時羣瑞畢臻崑崙之北玉山之神人身虎首豹尾蓬頭戴勝執几杖皓然白石城金室而居南有青鳥常為取食名曰西王母慕舜之德來獻白環及貢益地圖 瑞應圖曰王者承先王法度無遺失則來黃帝時西王母使使乘白鹿來獻白環 大戴禮曰舜

以天德嗣堯布恩散德日月出入莫不率俾西王母來

獻玉琯

異苑云零陵文學奚景於舜廟下得玉琯一即舜西王母所獻玉琯也漢律歷志注云西王母

獻舜白玉管
以玉為管也

四海神

金匱曰武王伐紂都洛邑陰寒雨雪一十餘日深丈餘
甲子朔旦有五丈夫乘馬車從兩騎至王門外欲謁武
王武王將出見之太公曰不可雪深丈餘五丈夫車騎
無跡恐是聖人太公乃持一器粥出門而進五車兩騎曰
王方未出天寒故進熱粥以禦寒而不知長幼從何來
兩騎曰先進南海君次進東海君次北海君次西海君

次河伯雨師風伯弼既畢使者告太公太公謂武王曰
此四海之神王可見之南海神曰祝融東海神曰勾芒
北海神曰玄冥西海神曰蓐收河伯名為憑雨師名詠
風伯名飛廉請以名前五神皆驚相視而歎祝融等皆拜
焉武王曰天陰遠來何以教之四海曰天代立周謹來
受命請勅風伯等各奉其職 墨子曰鄭繆公晝處廟
有神入門而左鳥身素服三純面狀正方繆公乃懼神
曰無奔帝享汝明德使錫壽十年使君昌公問神名神

曰勾芒

國語夏之興也融降於崇山

融祝融也崇高山也夏居陽

城高山所近也

登山神

管子曰桓公北征孤竹未至卑耳溪十里援弓將射未敢發見人長尺而人物具冠右祛衣走馬前疾管仲曰臣聞登山之神有俞兒者長尺人物具焉伯王之君興則見且走馬前導也右祛示從右涉至溪如所言公拜馬前曰仲父之聖若此對曰夷吾聞聖人先知無形

非有形而後知臣非聖人臣承教者也

神女

瑞應圖曰美女者蓋神女也君德被遠則至周穆王時持酒來酌之

神怪

神吟嘯

淮南子曰夏桀亂四時之政黃神吟嘯鬼神失其常

神降莘

左傳莊公三十二年有神降於莘

有神聲以接人莘號地

惠王問

內史過曰是何故對曰周之將興明神降之鑒其德也

將亡神又降之觀其惡也故有得神以興亦有以亡虞

夏商周皆有之王曰若之何對曰以其物享焉其至之

日亦其物也

享祭也若以甲乙日至祭先脾王用蒼服尚青以此而祭也

王從之內

史過往聞號請命

聞號請於神求賜土田之命

反曰號必亡矣虐而

聽於神神居莘六月號公使祝應宗區史嚚享焉神賜

之土田

祝大祝也宗宗人也史大史也應區嚚人名也

史嚚曰號其亡乎吾聞

之國將興聽於民

政順民心

將亡聽於神

求福於神

神聰明正直

而一者也依人而行

唯德是與

虢多涼德其何土之能得

涼薄也謂

二年晉滅虢也

回祿神蓍叔神

國語曰夏之亡也回祿信於聆隧

回祿火神再宿為信聆隧地名也

又曰

虢公夢在廟

虢公王季之子文王之弟虢公醜也廟室廟也

有神人面白毛

虎爪執鉞於西阿

西榮也

公懼而走神曰無走帝命曰使

晉襲於爾門

帝天也襲入也

公拜稽首覺召使嚳占之對曰如

君之言則蓍叟也天之刑神

刑殺神也

天事官成

官成禍福各以官象

成也公使囚之且使國人賀夢

欲轉吉故使賀也

舟之僑

大夫也

告

其諸族曰衆謂虢不久吾乃今知之

以其賀夢

其適晉六年

虢亡

神致璧

史記秦始皇三十六年秋使者從關東夜過華陰平舒

道有人持璧遮使者曰為吾遺鎬池君

服虔曰水神也張晏曰武王居

鎬鎬池君則武王也武王伐商故神云始皇荒淫若紂矣今亦可伐也孟康曰長安西南有鎬池也言曰

今年祖龍死

蘇林曰祖始也龍人君之象謂始皇也

使者問其故因忽不

見置其壁去使者奉壁具以聞始皇默然良久曰山鬼固不過知一歲事也退言曰祖龍者人之先也使御府視壁乃二十八年行度江所沉壁也三十七年始皇崩於沙丘

神降不見形

吳志孫權傳曰太元元年五月臨海羅陽縣有神自稱王表周旋民間語言飲食與人無異然不見形又有一

婢名紡績是月遣中書郎李崇貴輔國將軍羅陽王印綬迎王表李崇既至與崇及所在郡守令長談論崇等無以易所過山川遣婢與其神相聞秋七月崇與表至權於蒼龍門外為立第舍表說水旱小事徃徃有驗十一月權祭郊還寢疾二年二月表亡至四月權薨

池神見

幽明錄曰晉武帝於殿上窓下清曙忽見一人著白幃黃絹單衣舉身沾濕自稱是華林園中池水神名曰淋

冷君也若善見待有福祐時帝飲已醉取常佩刀空擲
之刀空過無礙神忽曰不以往事垂接當令知所過居
少時而暴崩

鬼恠

鬼見

天鏡曰鬼見官府及私宅內失土地之象 國語曰周之

衰也杜伯射王於鄩

注云常昭曰鄩鄩京也杜伯爵陶唐氏之後也

春秋曰宣

王殺杜伯而不辜後三年宣王會諸侯田於圃日中杜

伯起於道右朱衣冠操朱弓矢射宣王中心折脊而死

也左傳曰莊公八年十二月齊侯游于姑勞遂田于

貝丘

姑勞貝丘皆齊地田獵也

見大豕從者曰公子彭生也

公見大豕而從

者見彭生皆妖鬼也

公怒曰彭生敢見射之豕人立而啼公懼墜

於車傷足喪屨

漢書五行志曰高后八年三月自灊工

還枳道見物如蒼狗攢高后腋怒見趙王如意為祟

遂病腋傷而崩先是后殺如意

鬼擲人屋

天鏡曰鬼擲人屋扣門戶如賊盜劫人不出一年民人疾病

鬼呼

墨子曰夏桀之時鬼呼於國 天鏡曰鬼呼大人當之
是謂喪亡不出一年天下爭地一曰哭祖民分散 述
異記曰呂光永康二年有鬼叫於都衛曰兄弟相滅百
姓斃兩口絕祀吏尋聲視之則靡所見是年光死嬌子
紹立五日紹庶兄纂纂紹自立明年纂弟車騎大將軍

常山公征伐屢有戰功疑篡不已帥衆攻篡所殺無窮
常酗遊走無度明年因醉為從弟超所殺超推兄隆為
主姚興因豐遣叔父征西將軍隴西公碩德伐之隆師
徒撓敗乃稱蕃於姚氏三年遂為姚氏所滅

鬼吟哭

墨子曰夏桀之時鬼叫於國商紂之亡有鬼宵吟 董
仲舒五行逆順曰人君簡宗廟不禱祝咎及於外則鬼
夜哭 京房曰國虛空人君有尸祿則鬼夜哭 晉陽

秋曰符堅未敗常安市鬼夜哭一月乃止
京房曰鬼夜哭國將亡

唐開元占經卷一百十三